

Mien - Agape Ging-Sou - God's Love Letter Scriptures

Yo^han 15:9 "Zaangc Diex hnangv haaix nor hnamv yie, yie yaac hnangv wuov nor hnamv meih mbuo. Meih mbuo oix zuqc kaux wuonv yie hnamv mienh nyei hnyouv.

I^saa^yaa 43:1 O Yaakopv aac, zeix meih daaih wuov dauh, O I^saa^laa^en aac, nanv meih daaih nyei Ziouv, ih zanc hnangv naaiv nor gorngv, "Maiv dungx gamh nziex weic zuqc yie zuoqc meih nzuonx daaih aqv. Yie ziux meih nyei mbuox heuc meih. Meih benx yie nyei mi'aqv.

Ye^le^mi 1:5 "Yie maiv gaengh zeix meih daaih yiem maa nyei ga'sie wuov zanc, yie hiuv duqv meih. Meih maiv gaengh cuotv seix, yie yaac ginv ziangx meih. Yie paaiv meih douc waac bun maanc guoqv mienh."

Yo^han 15:16 Maiv zeiz meih mbuo ginv yie, se yie ginv meih mbuo. Yie paaiv meih mbuo cuotv mingh ziangh biouv camv, dongh yietc liuz maiv haih waaic nyei biouv. Hnangv naaic meih mbuo dengv yie nyei mbuox tengx Zaangc Diex tov haaix nyungc, ninh ziouc ceix wuov nyungc bun meih mbuo.

3 Yo^han 1:2 Hnamv nyei loz-gaeng aah! Yie tov Tin-Hungh bun meih zoux haaix nyungc yaac haengh wangc aengx bun meih wangc siangx, hnangv yie hiuv duqv meih nyei lingh wuonh wangc siangx nor.

I^saa^yaa 43:4 Weic zuqc ziux yie nyei m'zing mangc, meih se jaaix haic. Yie taaih meih yaac hnamv meih. Yie ziouc zorqv mienh longc tiuv meih, yaac zorqv zlex fingx mienh yienc meih nyei maengc.

Ye^le^mi 31:3 Zinh ndaangc Ziouv yiem go nyei dorngx hinc cuotv bun ninh ziouc gorngv, "Yie hnamv meih se yietc liuz hnamv, weic naaiv yie zanc-zanc ziepc zuoqv nyei hnamv meih.

Ho^se^yaa 11:8 "E^faa^im aah! Yie hnangv haaix nor haih bungx guangc meih? I^saa^laa^en aah! Yie hnangv haaix nor haih zorqv meih jiu bun ganh dauh? Yie hnangv haaix nor haih bun meih hnangv Atc^maa? Yie hnangv haaix nor haih zoux bun meih hnangv zoux bun Se^mbo^yim? Yie nyei hnyouv faanv-fei lunc, weic zuqc yie za'gengh korv-lienh ninh mbuo.

Yo^han 3:16 "Tin-Hungh ndongc naaic hnamv lungh ndiev mienh cingx zorqv ninh nyei ndoqc Dorn ceix bun ninh mbuo. Haaix dauh sienx kaux Tin-Hungh nyei Dorn maiv zuqc mietc mv baac duqv yietc liuz nyei maengc.

I^saa^yaa 49:15,16 "Maa haih la'kuqv hopv ninh nyei nyorx nyei gu'nguaaz fai maiv korv-lienh ninh ganh yungz nyei fu'jueiv fai? Maiv gunv ninh haih la'kuqv, yie maiv la'kuqv meih. 16 Mangc maah! Yie zorqv meih nyei mbuox fiev jienv yie nyei buoz-zaangv-or. Meih nyei zingh laatc zanc-zanc yiem yie nyei nza'hmien.

I^saa^yaa 41:13 Weic zuqc yie, Ziouv, meih nyei Tin-Hungh, nanv meih nyei mbiaauc jieqv buoz. Se dongh yie gorngv mbuox meih, maiv dungx gamh nziex, yie oix tengx meih.

Matv^taai 28:20 yaac njaux ninh mbuo ei nzengc yie mbuox meih mbuo zoux

nyei nyungc-nyungc. Jangx jienv oc. Yie yietc liuz caux meih mbuo yiem taux baamh gen nyei setv mueiz.

Yo^han 14:1 Yesu aengx gorngv, "Maiv dungx hnyouv huaang hnyouv nzauh. Oix zuqc sienx kaux Tin-Hungh yaac sienx kaux yie.

I^saa^yaa 41:14 O Yaakopv aac, meih hnangv gaeng-mau maiv henv, maiv dungx gamh nziex. O I^saa^laa^en aac, meih faix. Yie ganh oix tengx meih." Naaiv se Ziouv gorngv, dongh Zuoqc Meih Wuov Dauh, se I^saa^laa^en nyei Cing-Nzengc Tin-Hungh.

I^saa^yaa 43:2 Meih jiex wuom nyei ziangh hoc, yie caux meih yiem. Meih jiex ndaaih, ndaaih nyei wuom yaac maiv yiemx meih. Meih yangh douz jiex, meih maiv zuqc douz buov, douz-mbietc yaac maiv zieqc meih.

Singx Nzung 23:1-6 Ziouv goux yie hnangv goux ba'gi yungh nyei mienh goux ninh nyei ba'gi yungh nor, yie ziouc maiv caa haaix nyungc. 2 Ninh bun yie bueix njiec miev nyiemz nyei dorngx, dorh yie yiem wuom sienc nyei ndoqv-hlen. 3 Ninh bun yie nyei hnyouv fingv jiez daaih. Weic ninh ganh nyei mbuox ninh yienz yie yangh zoux horpc nyei jauv. 4 Maiv gunv yie yangh zuqc daic nyei dongh linh, hmuangx nyei horngz mingh, yie maiv gamh nziex zuqc haaix nyungc hoic, weic zuqc meih caux yie yiem. Meih longc biaav-mbiaac caux ndaangh ngau goux jienv yie. 5 Meih yiem yie nyei win-wangv nyei nza'hmien meih mbenc nyanc hopv bun yie. Meih longc youh hietv yie nyei m'nqorngv, yie nyei zaanv buangv mienz nzengc. 6 Yie hiuv dingc Ziouv yietc seix korv-lienh yaac zoux longx bun yie. Yie yaac duqv yiem Ziouv nyei biauv taux maanc gouv maanc doic.

Yo^han 14:27 "Yie liouh baengh orn bun meih mbuo. Se yie ganh nyei baengh orn yie ceix bun meih mbuo. Yie bun nyei maiv hnangv baamh mienh bun nyei. Maiv dungx nzauh faanh yaac maiv dungx gamh nziex.

Fi^lipv^poi 4:7 Tin-Hungh nyei baengh orn, dongh baamh mienh zungv hnamv maiv zaaic nyei baengh orn, ziouc beu jienv meih mbuo nyei hnyouv caux hnamv nyei jauv, weic zuqc meih mbuo caux Giduc Yesu juangc maengc ziangh.

Cong-Mengh Waac 3:24 Meih bueix njiec nyei ziangh hoc maiv dungx gamh nziex, meih bueix njiec, meih ziouc m'njormh duqv kuv.

Singx Nzung 4:8 Yie oix baengh orn nyei bueix njiec m'njormh weic zuqc Ziouv aac, kungx meih ganh bun yie duqv yiem longx.

Singx Nzung 33:18 Mv baac Ziouv nyei m'zing mangc jienv gamh nziex ninh, taaih ninh wuov deix, dongh kaux ninh ziepc zuoqv hnamv mienh nyei hnyouv wuov deix.

Lomaa 5:2 Weic zuqc mbuo sienx kaux Giduc ninh ziouc bun mbuo hiuv Tin-Hungh nyei en, dongh mbuo ih zanc duqv nyei en. Mbuo a'hneiv haic weic zuqc hiuv dingc mbuo oix duqv buonc Tin-Hungh nyei njang-laangc.

I^saa^yaa 55:12 Meih mbuo zungv oix njien-njien youh youh nyei cuotv Mbaa^mbi^lon. Baengh baengh orn-orn nyei nzuonx. Domh mbong fiuv-mbong oix yiem meih mbuo nyei nza'hmien cuotv qies mbui nyei baaux nzung. Yiem lomc-huaang nyei ndiangx yaac oix mbaix buoz-zaangv.

Yo^han 16:22 "Meih mbuo yaac hnangv naaiv nor. Ih zanc meih mbuo hnyouv nzauh, mv baac yie aengx oix daaih lorz meih mbuo, meih mbuo ziouc njien-youh orn-lorqc. Naaiv nyungc orn-lorqc maiv maaih haaix dauh haih zorqv duqv cuotv.

Lugaa 12:9 Mv baac haaix dauh maiv dorng zuangx nyiemc yie, yie, Baamh Mienh nyei Dorn, yiem Tin-Hungh nyei fin-mienh nyei nza'hmien maiv nyiemc wuov dauh aqv.

Matv^taai 10:30 Liemh meih mbuo nyei mba'biei zungv saauv nzengc mi'aqv.

I^saa^yaa 54:10 Maiv gunv domh mbong zuqc zorqv nqoi, fiuv-mbong zuqc ndanc dongz, yie oix yietc liuz ziepc zuoqv nyei hnamv meih, maiv bungx ndortv. Yie laengz baengh orn nyei ngaengc waac yietc liuz maiv leih nqoi meih." Naaiv se Ziouv, dongh korv-lienh meih wuov dauh, gorngv nyei waac.

Matv^taai 11:28-30 "Meih mbuo haaix dauh kouv hnangv nyiex ga'naaiv hniev, gunv daaih yie naaiv. Yie oix bun meih mbuo hitv kuonx. 29 Zorqv yie nyei ndiangx-gaaz gaaz jienv, zuotc yie nyei nyungc, weic zuqc yie hnyouv suonc, horh norh, meih mbuo ziouc duqv baengh orn. 30 Weic zuqc yie bun meih mbuo wuov norm ndiangx-gaaz kuh gaaz nyei. Yie bun meih mbuo nyiex nyei ga'naaiv yaac heng."

Saa^lo^morn Nyei Nzung 2:10 Yie hnamv nyei dorn gorngv mbuox yie, Yie hnamv nyei sieqv aac, jiez daaih maah! Yie hnamv nyei sieqv-nzueic, caux yie mingh maah!

Ho^se^yaa 2:14,19,20 Weic naaiv mangc maah! Yie oix yuoqc ninh, dorh ninh bieqc deic-bung-huaang gorngv orn hnyouv nyei waac. 19 Yie oix gorngv ziangh meih, bun meih yietc liuz benx yie nyei auv. Yie oix longc zoux horpc nyei jauv, baengh fim nyei, ziepc zuoqv hnamv mienh nyei hnyouv caux korv-lienh nyei hnyouv gorngv ziangh meih. 20 Yie oix ziepc zuoqv nyei gorngv ziangh meih. Meih ziouc hiuv duqv yie, Ziouv."

Cuotv I^yipv 3:14 Tin-Hungh gorngv mbuox Mose, "Yie nyei mbuox heuc, Yietc Liuz Ziangh Jienv Wuov Dauh. Meih oix zuqc mbuox ninh mbuo, 'Mbuox heuc Yietc Liuz Ziangh Jienv Wuov Dauh paaiv yie daaih lorz meih mbuo.' "

Ho^se^yaa 13:4 "Yiem I^yipv cuotv daaih yie se Ziouv, meih mbuo nyei Tin-Hungh. Cuotv liuz yie, meih mbuo maiv hiuv ganh dauh Tin-Hungh. Cuotv liuz yie yaac maiv maaih ganh dauh Njoux Ziouv.

Yo^han 15:14 Se gorngv meih mbuo ei jienv yie mbuox nyei waac zoux, meih mbuo ziouc zoux yie nyei gorx-youz aqv.

Laauc Yaangh 3:20 Mangc maah! Yie souv jienv gaengh ndaangc ngaengv gaengh. Haaix dauh haiz yie nyei qieq yaac koi gaengh yie ziouc bieqc mingh caux ninh nyanc hnaangx, ninh yaac caux yie nyanc hnaangx.